

Na osnovu člana 101 d. Zakona o socijalnoj zaštiti, zaštiti civilnih žrtava rata i zaštiti porodice sa djecom – Prečišćeni tekst („Službeni glasnik Unsko-sanskog kantona“, broj 9/26 i 13/26), ministar zdravstva, rada i socijalne politike Unsko-sanskog kantona donosi:

PRAVILNIK

o kriterijima, postupku i potrebnoj dokumentaciji za ostvarivanje prava na novčanu naknadu za treće i svako sljedeće dijete u porodici

I OPĆE ODREDBE

Član 1.

(Predmet)

Ovim Pravilnikom bliže se uređuju kriteriji, uslovi, postupak ostvarivanja prava, potrebna dokumentacija, način isplate, te vođenje evidencije o ostvarenom pravu na novčanu naknadu za treće i svako sljedeće dijete u porodici na području Unsko-sanskog kantona.

Član 2.

(Definicije)

- (1) Pod pojmom „treće i svako sljedeće dijete u porodici“ podrazumijeva se treće, četvrto i svako sljedeće dijete podnosioca zahtjeva.
- (2) Pojam „trećeg i svakog sljedećeg djeteta u porodici“ iz stava (1) ovog člana odnosi se i na dijete koje se smješta u hraniteljsku porodicu kao treće i svako sljedeće dijete, računajući i biološku djecu hranitelja i pod uvjetom da podnosilac zahtjeva ima status hranitelja.

Član 3.

(Gramatička terminologija)

Izrazi koji su u ovom Pravilniku, radi preglednosti, dati u jednom gramatičkom rodu odnose se jednako na osobe muškog i ženskog spola.

II KRITERIJI I USLOVI ZA OSTVARIVANJE PRAVA

Član 4.

(Korisnici prava i starosna dob djeteta)

- (1) Pravo na novčanu naknadu za treće i svako sljedeće dijete u porodici ostvaruje se za svako dijete starosti do šest godina života.
- (2) Podnosilac zahtjeva za ostvarivanje prava na naknadu za treće i svako sljedeće dijete je jedan od roditelja, a roditelji sporazumno određuju koji od njih će biti podnosilac zahtjeva, te usvojitelj, odnosno hranitelj.

Član 5.

(Uslovi za ostvarivanje prava)

- (1) Uslovi za ostvarivanje prava na novčanu naknadu za treće i svako sljedeće dijete u porodici su:
 - a) da roditelji imaju prebivalište na području Unsko-sanskog kantona (u daljnjem tekstu: Kanton) najmanje šest mjeseci prije podnošenja zahtjeva;
 - b) da prvo, drugo i dijete za koje se podnosi zahtjev žive u zajedničkom domaćinstvu s roditeljima na području Kantona;

- c) da dijete za koje se ostvaruje pravo na novčanu naknadu nije smješteno u hraniteljsku porodicu, ustanovu socijalne zaštite ili drugu ustanovu, za koje se troškovi smještaja osiguravaju iz budžeta Kantona;
- d) da su sva djeca u porodici prijavljena na zdravstveno osiguranje kod Zavoda zdravstvenog osiguranja Unsko-sanskog kantona;
- e) da sva djeca iz porodice koja su uzrasta za osnovnu školu istu pohađaju u Kantonu;
- f) da roditelji ne ostvaruju isto ili slično pravo na području drugog grada, općine, kantona ili entiteta u slučaju kada jedan od roditelja ima prebivalište izvan Kantona.

Član 6.

(Izuzeci od zajedničkog života)

- (1) Izuzetno, na ostvarivanje prava na novčanu naknadu za treće i svako sljedeće dijete u porodici neće utjecati ukoliko je prvo ili drugo dijete napustilo zajedničko domaćinstvo uslijed stjecanja punoljetstva, zaključenja braka ili drugih opravdanih okolnosti.
- (2) U slučaju razvoda braka roditelja ili prestanka vanbračne zajednice, uslov prebivališta u Kantonu, odnosno zajedničkog domaćinstva, traži se samo za roditelja kojem je pravosnažnom odlukom suda ili organa starateljstva povjerena briga nad djetetom i s kojim dijete živi, te je taj roditelj korisnik prava iz člana 4. ovoga Pravilnika.
- (3) Izuzetno od stava (2) ovog člana, pravo na novčanu naknadu može ostvariti i roditelj kojem odlukom nadležnog suda ili organa starateljstva nisu povjerena djeca iz prethodnog braka ili vanbračne zajednice, ukoliko je u novom braku ili vanbračnoj zajednici stekao dijete koje, zajedno sa djecom iz prethodnog braka ili vanbračne zajednice, predstavlja treće ili svako sljedeće dijete prema redoslijedu rođenja, pod uslovom da uredno izvršava obavezu izdržavanja djece iz prethodnog braka ili vanbračne zajednice utvrđenu izvršnom sudskom odlukom, sudskom nagodbom ili drugim izvršnim aktom.
- (4) U cilju utvrđivanja okolnosti iz stava (3) ovog člana, smatra se da roditelj redovno izvršava obavezu izdržavanja djece iz prethodnog braka ili vanbračne zajednice ukoliko nema dospjelih, a neizmirenih obaveza po osnovu izdržavanja u trajanju dužem od dva mjeseca.
- (5) Izuzetno od člana 5. stav (1) tačka a) ovog Pravilnika, činjenica da jedan od roditelja nema isto mjesto prebivališta kao ostali članovi porodice neće utjecati na ostvarivanje prava, ukoliko je razlika u mjestu prebivališta posljedica zaposlenja, obavljanja samostalne djelatnosti i sl.
- (6) Izuzetno od člana 5. stav (1) tačka e) ovog Pravilnika, pravo na novčanu naknadu može se priznati i kada jedno od djece pohađa školu izvan područja Kantona, odnosno na području drugog kantona ili entiteta, ukoliko dijete ima prijavljeno prebivalište na području Kantona i ostvaruje pravo na zdravstveno osiguranje putem Zavoda zdravstvenog osiguranja Unsko-sanskog kantona.

III POTREBNA DOKUMENTACIJA

Član 7.

(Dokumentacija potrebna za ostvarivanje prava)

- (1) Uz zahtjev za ostvarivanje prava na novčanu naknadu Obrazac NNTD, koji se nalazi u prilogu Pravilnika i čini njegov sastavni dio, podnosilac je dužan priložiti sljedeću dokumentaciju:
 - a) Izvod iz matične knjige rođenih za svu djecu;

- b) Uvjerenje o prebivalištu za roditelje;
 - c) Uvjerenje o zajedničkom domaćinstvu/ kućanstvu;
 - d) Potvrda nadležnog organa/centra da drugi roditelj nije ostvario isto ili slično pravo na području drugog kantona ili entiteta u slučaju kada jedan od roditelja nema prebivalište u Kantonu;
 - e) Potvrda poslodavca o mjestu rada kada jedan od roditelja nema isto mjesto prebivališta kao ostali članovi porodice;
 - f) Potvrdu Zavoda zdravstvenog osiguranja Unsko-sanskog kantona o prijavi djece na zdravstveno osiguranje;
 - g) Potvrda o pohađanju škole u Kantonu za djecu iz porodice koja su uzrasta za osnovnu školu;
 - h) Rješenje ili uvjerenje o priznatom statusu ukoliko se radi o hraniteljskoj porodici , odnosno hranitelju kao podnosiocu zahtjeva;
 - i) Dokaz o otvorenom transakcijskom računu podnosioca zahtjeva;
- (2) Nadležni centar za socijalni rad (u daljnjem tekstu: centar) ima pravo tražiti i izvoditi i druge dokaze o ispunjavanju uslova za ostvarivanje prava, ukoliko to smatra potrebnim i osnovanim.

IV POSTUPAK I NAČIN OSTVARIVANJA PRAVA

Član 8.

(Mjesna nadležnost i rješavanje)

- (1) Postupak za ostvarivanje prava pokreće se pismenim zahtjevom koji se podnosi na propisanom obrascu.
- (2) Zahtjev se podnosi nadležnom centru prema mjestu prebivališta podnosioca zahtjeva.
- (3) O pravu na novčanu naknadu odlučuje nadležni centar rješenjem, u skladu sa odredbama Zakona o upravnom postupku („Sl. novine FBiH“ br. 2/98, 48/99 i 61/22).

Član 9.

(Početak i trajanje prava)

- (1) Pravo na novčanu naknadu korisniku pripada od prvog dana narednog mjeseca po podnošenju zahtjeva za ostvarivanje prava.
- (2) Pravo traje dok dijete za koje se naknada isplaćuje ne navrši šest godina života, pod uslovom da su u tom periodu kontinuirano ispunjeni uslovi iz člana 5. ovog Pravilnika.
- (3) Ukoliko se radi o ostvarivanju prava na osnovu djeteta koje se nalazi u hraniteljskoj porodici, pored uslova propisanih članom 5. ovog Pravilnika, pravo traje dok se dijete nalazi na smještaju u hraniteljskoj porodici.

V VISINA NAKNADE, NAČIN ISPLATE I FINANSIRANJE

Član 10.

(Visina i usklađivanje naknade)

Visina novčane naknade utvrđuje se odlukom Vlade Kantona, na prijedlog Kantonalnog ministarstva zdravstva, rada i socijalne politike, jednom godišnje, a u skladu sa planiranim i osiguranim sredstvima u Budžetu Kantona.

Član 11.
(Način isplate)

- (1) Isplata novčane naknade vrši se na mjesečnom nivou, a na osnovu pravosnažnih rješenja i zahtjeva za doznačavanje sredstava koje dostavljaju centri.
- (2) Sredstva za ove namjene osiguravaju se u Budžetu Kantona.

VI OBAVEZE KORISNIKA I CENTARA ZA SOCIJALNI RAD

Član 12.
(Obaveze korisnika prava)

- (1) Korisnik prava na novčanu naknadu za treće i svako sljedeće dijete u porodici dužan je u svakoj kalendarskoj godini u razdoblju od 1. do 30. septembra dostaviti dokaze o ispunjavanju uslova za daljnje korištenje prava.
- (2) Dokazi o ispunjavanju uslova za daljnje korištenje prava su:
 - a) uvjerenje o prebivalištu za roditelje;
 - b) potvrda Zavoda zdravstvenog osiguranja Unsko-sanskog kantona o prijavi djece na zdravstveno osiguranje;
 - c) potvrda o pohađanju škole u Kantonu za djecu iz porodice koja su uzrasta za osnovnu školu.
- (3) Ukoliko korisnik ne dostavi dokaze u roku iz stava (2) ovoga člana, pravo na novčanu naknadu za treće i svako sljedeće dijete u porodici prestaje s danom 30. septembra tekuće godine.
- (4) Korisnik prava na novčanu naknadu za treće i svako sljedeće dijete u porodici dužan je prijaviti svaku promjenu uslova iz člana 5. Pravilnika, a koja je od utjecaja na prestanak prava u roku od 15 dana od dana nastale promjene.
- (5) Korisnik koji nije prijavio promjenu koja je od utjecaja na ostvarivanja prava, dužan je vratiti neosnovano primljene iznose.
- (6) O povratu neosnovano isplaćenih iznosa novčane naknade zaključuje se pisani sporazum između korisnika i centra.
- (7) Ukoliko korisnik odbije potpisivanje sporazuma o povratu neosnovano isplaćenih iznosa novčane naknade na način propisan u stavu (5) ovog člana, centar će pokrenuti sudski postupak radi povrata neosnovano isplaćenih iznosa novčane naknade.
- (8) Povrat neosnovano isplaćenih iznosa novčane naknade vrši se u Budžet Kantona.

Član 13.
(Obaveza centra)

- (1) Centar po službenoj dužnosti redovito provjerava starost djeteta i u skladu s tim odlučuje o nastavku ostvarivanja prava na novčanu naknadu za treće i svako sljedeće dijete u porodici.
- (2) Ukoliko Centar utvrdi da se novčana naknada za treće i svako sljedeće dijete u porodici ne koristi za potrebe djeteta, te bez saglasnosti drugog roditelja može odrediti da se isti isplaćuje drugom roditelju.
- (3) Centri dužni su na transparentan način (putem službene web stranice, oglasne ploče ustanove i sl.) informirati građane o uslovima, potrebnoj dokumentaciji i načinu ostvarivanja prava iz ovog Pravilnika.

VII PRESTANAK PRAVA

Član 14.

(Prestanak prava)

- (1) Pravo na novčanu naknadu za treće i svako sljedeće dijete u porodici prestaje:
- a) kada dijete navrši šest godina;
 - b) ako korisnik prava nije u propisanom roku iz člana 12. stav (1) ovoga Pravilnika dostavio dokaze o ispunjavanju uslova za nastavak korištenja prava;
 - c) ako dijete ili netko od članova porodice napusti zajedničko domaćinstvo, osim izuzetka utvrđenih ovim Pravilnikom;
 - d) ako dijete bude smješteno u hraniteljsku porodicu, ustanovu socijalne zaštite ili drugu ustanovu za koje se troškovi smještaja osiguravaju iz budžetskih sredstava;
 - e) smrću djeteta;
 - f) prestankom smještaja u hraniteljsku porodicu, ukoliko je riječ o hraniteljskoj porodici odnosno hranitelju kao podnosiocu zahtjeva.
- (2) Korisniku prava na novčanu naknadu za treće i svako sljedeće dijete u porodici pravo prestaje zadnjeg dana mjeseca u kojem je nastupila okolnost iz stava (1) ovoga člana.

VII PRELAZNE I ZAVRŠNE ODREDBE

Član 15.

(Stupanje na snagu)

Ovaj Pravilnik stupa na snagu danom donošenja i objavljuje se u Službenom glasniku Unsko-sanskog kantona, a primjenjuje se od 01.09.2026. godine.

Broj: 09-02-9509-1/26
Bihać, 10.08.2026. godine



Prezime (ime jednog roditelja) i ime

Adresa i broj telefona

JU Centar za socijalni rad _____

PREDMET: Zahtjev za ostvarivanje prava na novčanu naknadu za treće i svako sljedeće
dijete u porodici;

Podnosim zahtjev za priznavanje prava na novčanu naknadu po osnovu djeteta starosti do
6. godina:

1. koje je u porodici rođeno kao treće i svako sljedeće dijete;
 2. koje je u hraniteljskoj porodici smješteno kao treće i svako sljedeće dijete.
- (zaokružiti odgovarajuću opciju)

Prezime (ime roditelja) i ime djeteta

Datum rođenja djeteta

Dokumentacija potrebna za ostvarivanje prava (zaokružiti na obrascu dokumente koji su prilog zahtjeva);		
1. Izvod iz matične knjige rođenih za svu djecu	Original/ovjerena kopija	Podnosilac zahtjeva
2. Uvjerenje o prebivalištu za roditelje	Original/ovjerena kopija	Podnosilac zahtjeva
3. Uvjerenje o zajedničkom domaćinstvu/kućanstvu	Original/ovjerena kopija	Podnosilac zahtjeva

4. Potvrda nadležnog organa/centra da drugi roditelj nije ostvario isto ili slično pravo na području drugog kantona ili entiteta u slučaju kada jedan roditelj ima prebivalište izvan USK	Original/ovjerena kopija	Podnosilac zahtjeva
5. Potvrda poslodavca o mjestu rada u slučaju kada jedan od roditelja nema isto mjesto prebivališta kao ostali članovi porodice	Original/ovjerena kopija	Podnosilac zahtjeva
6. Potvrdu Zavoda zdravstvenog osiguranja USK o prijavi djeteta do 6 godina starosti na zdravstveno osiguranje	Po službenoj dužnosti	Centar za socijalni rad
7. Potvrda o pohađanju škole za djecu starosti preko 6. godina	Original/ovjerena kopija	Podnosilac zahtjeva
8. Rješenje priznatom statusu hranitelja, u slučaju kada je je podnosilac zahtjeva hranitelj	Po službenoj dužnosti	Centar za socijalni rad
9. Dokaz o otvorenom transakcijskom računu podnosioca zahtjeva	Kopija kartice ili potvrda banke	Podnosilac zahtjeva

Dodatna dokumentacija (opciono):

** Svojim potpisom podnosilac zahtjeva daje saglasnost za korištenje i obradu ličnih podataka u svrhu rješavanja predmetnog zahtjeva*

(mjesto i datum)

(potpis podnosioca zahtjeva)